


Awor pa actua cu sabiduria pa salvaguardia existencia di Shoco



Shoconan por biba frankilo cerca di hende, basta cu ta duna nan e espacio y proteccion necesario. Un Shoco ta keda fiel na e area unda el a nace.



E mirada impactante di un Shoco.

ORANJESTAD—Gobierno a formalisa e posicion di 'Shoco' como Simbolo Nacional di Aruba. E escogencia di e parha endemico aki ta refleha e status special di e animal riba nos isla, y e urgencia pa tuma pasonan necesario pa sigura su proteccion.

Un Simbolo Nacional ta algo cu mester para pa, of representa otro. Shoco como tal ta representa e factor unico di Aruba, siendo cu animal cu ta endemico di Aruba. E 'Athene cuniculario arubensis' ta aparece unicamente na Aruba, y su nomber cientifico ta refleha esaki. Pero e hecho cu e especie a haya e nomber cientifico 'Athene' ta pa motibo cu for di tempo di e gran filosofonan Griego a considera e Shoco como representacion di sabiduria. Y sabiduria sigur ta un característica cu Aruba mester na tur momento. Un simbolo nacional ademas ta representa un elemento cultural comun.

For di hopi tempo caba a reconoce cu Shoco ta representa sabiduria y tenacidad. For di e prome documental traha riba Shoco produci pa Roos Production, te na scoge di e Shoco Awards di parti di AHATA, tur tabata refleho di un conscientisacion creciente di e caracter unico di e parha chikito, pero yen di personalidad aki. Cu aumento di interes pa medio ambiente na Aruba, particularmente di parti di Aruba Birdlife Conservation

e nivel di conscientisacion a yega na un nivel mas haltu. E mas recien tabata e representacion di 'Shoco' den Carnaval di Aruba, cu entre otro un road piece di Edwin Barry diseña pa Michael Douglas cu a gana hopi admiracion y premio durante ultimo parada di carnaval.

Mas y mas hende ta cuminsa reconoce Shoco, nan habitat y ta preocupa pa perdida di nan ambiente natural. Aunke cu Shoco por biba frankilamente banda di areanan residencial, falta di respet pa e animal aki ta pone nan bida na peliger.

Consecuentemente, na momento cu e Shoco haya e status special, como Simbolo Nacional, e ta nifica tambe cu ciudadanonan na Aruba tambe mester asumi un responsabilidad moral pa proteha e Shoco. Proyectonan infraestructural publico y priva mester tene cuenta cu presencia di neishinan di Shoco prome cu haci un tereno limpi pa construccion.

Di otro banda, pa e Shoco, como parha haya e proteccion necesario, e mester tin e sosten legal. Mester bin cu leynan pa berdad segura cu ningun hende ta anda cu Shoco y nan habitat na un forma irresponsabel. Y cu tin consecuencia legal na momento cu algo pasa. Ademas, ta pa medio di cuadronan legal cu por determina e pasonan necesario na momento cu mester por ehempel, realoca un famia di Shoco

pa un luga mas sigur, leu di pushi y cacho, leu di actividadnan humano cu ta nifica nan destruccion.

E paso pa nombra e Shoco

como un Simbolo Nacional ta e prome den e bon direccion y ta enfatisa e urgencia pa bin cu e leynan necesario pa definitiva-

mente por bisa cu e Shocotey pa keda, representando e miho di Aruba, esta cu ta un isla cu ta uza su sabiduria pa bay dilanti. □